

Indeks harga besi, simen turun

KUALA LUMPUR - Harga besi bagi hampir semua kawasan Malaysia mencatat penurunan bulan ke bulan pada Julai 2023 dengan indeks harga seunit besi berkurangan antara 0.5 peratus dan 4.0 peratus, kata Jabatan Perangkaan Malaysia (DOSM).

Ketua Perangkawan, Datuk Seri Mohd Uzir Mahidin berkata, indeks harga seunit keluli dan logam juga mencatatkan penurunan antara 0.2 peratus dan 4.0 peratus bagi beberapa kawasan di Semenanjung Malaysia, Sabah dan Sarawak.

“Penurunan indeks harga besi dan keratan keluli dan logam ini adalah seiring dengan senario penurunan harga besi dan bijih besi di peringkat global,” katanya dalam kenyataan media Indeks Kos Bahan Binaan Julai 2023 yang dikeluarkan pada Selasa.

Mohd Uzir berkata, selain besi dan keratan keluli dan logam, bahan utama binaan lain seperti simen juga mula mencatatkan penurunan harga berbanding Jun 2023 dengan kadar antara 0.2 peratus dan 1.7 peratus.

Dari segi perbandingan secara tahunan untuk tempoh Julai 2022 dan Julai 2023, menunjukkan indeks harga seunit simen telah mencatatkan peningkatan antara 2.9 peratus dan 23.8 peratus bagi kesemua kawasan di Semenanjung Malaysia, Sabah dan Sarawak, kata beliau.

Selain itu, dalam konteks item serta kawasan, indeks harga seunit bahan binaan di Semenanjung Malaysia meningkat antara 0.2 peratus hingga 23.8 peratus bagi Julai 2023 berbanding bulan sama tahun lepas.

Mohd Uzir berkata, peningkatan tertinggi bagi kawasan di Semenanjung Malaysia adalah simen di Kelantan dan Terengganu (23.8 peratus) dan di Pulau Pinang, Kedah dan Perlis (18.0 peratus).

Pada masa sama, indeks Kos Bahan Binaan Bangunan (IKB) termasuk bar keluli bagi semua kategori bangunan di Semenanjung Malaysia pada Julai 2023 meningkat antara 0.2 peratus dan 3.8 peratus berbanding bulan sebelumnya. - *Bernama*

Penurunan indeks harga besi, keratan keluli dan logam ini adalah seiring dengan senario penurunan harga besi dan bijih besi di peringkat global.
- *Gambar Fail*

